

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 108242 25 K
Visoko, 14.01.2026.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog S.S. sina Džemala iz Visokog, zbog krivičnog djela nasilje u porodici iz člana 222. stav 2. u vezi stavom 1. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0064103 25 od 07.10.2025.godine, na pretresu za izricanje krivično pravne sankcije održanom u prisustvu Kantonalnog tužitelja Mustafić Mesuda i optuženog S.S. , dana 14.01.2026.godine , donio je i javno objavio:

P R E S U D U

OPTUŽENI : S.S. , sin Dž. i majke M., rođene H., rođen 09.01.1990. godine u V., gdje je i nastanjen u U. H. K. broj 5, pismen, sa završenom srednjom školom, po zanimanju frizer, zaposlen, ..., oženjen, srednjeg imovnog stanja, Bošnjak, državljanin BiH, JMBG: ..., neosuđivan,

K r i v j e

Što je:

dana 25.05.2025. godine, oko 22,15 sati, na području V., u ugostiteljskom objektu „I.“, vlasništvo njega i njegove supruge M.K. , nasiljem, drskim i bezobzirnim ponašanjem ugrozio mir, tjelesnu cjelovitost i psihičko zdravlje člana svoje porodice, na način da je, nakon kraće verbalne prepirke sa suprugom s kojom živi u zajedničkom domaćinstvu, istu vrijeđao nazivajući je pogrđnim imenima, da bi je zatim uhvatio za vrat i povukao za kosu prilikom čega je pala na pod i počela plakati, nakon čega joj je oduzeo mobilni telefon i zadao joj je udarac nogom u natkoljenicu, te je prisilio da telefonom zove svoje roditelje kako bi je odveli, a potom u prisustvu svojih roditelja i njene majke uzeo flašu sa sredstvom za čišćenje i pogodio je u predjelu leđa, a potom prišao iza nje i zadao joj dva udarca nogom u predjelu zadnjice, usljed kojih udaraca je M.K. zadobila lake tjelesne ozljede konstatovane u JU Dom zdravlja Visoko,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje člana svoje porodice sa kojim živi u zajedničkom kućanstvu,

čim je učinio krivično djelo Nasilje u porodici iz člana 222. stav 2. u vezi stavom 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH,

i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 5(pet)mjeseci, a koja se neće izvršiti ako optuženi za vrijeme od 1(jedne)godine , od dana pravosnažnosti presude, ne počini novo krivično djelo.

Na osnovu čl.212 st.3 ZKP FBiH oštećena M.K. se sa imovinsko pravnim zahtjevom upućuje na parnični postupak.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0064103 25 od 07.10.2025.godine, optužilo je S.S. , zbog krivičnog djela Nasilje u porodici iz člana 222. stav 2. u vezi sa stavom 1. KZ FBiH.

Optužnica je potvrđena od strane sudije za prethodno saslušanje ovog suda dana 29.09.2025.godine.Na ročištu o izjašnjenju o krivnji dana 02.12.2025.godine, optuženi S.S. je izjavio da je kriv za krivično djelo Nasilje u porodici iz člana 222. stav 1. KZ F BiH

Na ročištu o razmatranju izjave o priznanju krivnje dana 14.01.2026.godine, sud se uvjerio da je optuženi S.S. izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi S.S. počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predložene dokaze i to : zapisnik o saslušanju svjedoka oštećena M.K. , kći N., H.K. broj ..., V., K.A., kći A., I. bb, B., u zapisnik o uviđaju PS Visoko broj:08-02-09/1-218/25 od 26.05.2025. godine, rješenje Općinskog suda u Visokom broj: 41 0 Pr 106686 25 Zm od 26.05.2025. godine, specijalistički nalaz hitne medicinske službe JU Dom zdravlja Visoko od 26.05.2025. godine, fotodokumentacija PS Visoko broj: 08-02-09/1-218/25 od 04.08.2025. godine i izvod iz kaznene evidencije PS Visoko od 27.05.2025. godine za osumnjičenog S.S..

Naime, priznanjem optuženog koje je u potpunosti i u skladu sa predloženim dokazima, nesporno je dokazano da je isti počinio krivično djelo koja mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglasio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom S.S. u kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćenju krivičnog postupka, kao i činjenicu da nije osuđivan te da se pomirio sa suprugom treći dan od navedenog događaja.

Cijeneći utvrđene okolnosti na strani optuženog, sud je optuženom S.S. u , za navedeno krivično djelo na osnovu članova: 42., 49. i 62. KZ FBiH, izrekao uslovnu osudu kojom se

optuženom za počinjeno krivično djelo utvrđuje kazna zatvora u trajanju od 5(pet)mjeseci, a koja se neće izvršiti ako optuženi za vrijeme od 1(jedne)godine , od dana pravosnažnosti presude, ne počini novo krivično djelo, u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu čl.212 st.3 ZKP FBiH sud je oštećenu M.K. se sa imovinsko pravnim zahtjevom uputio na parnični postupak.

Na osnovu člana 202 stav 1 u vezi sa članom 199. stav 2. tačka g) ZKP FBiH, sud je optuženog obavezao da platiti sudu na ime troškova krivičnog postupka u vidu paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Sudija
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.